



Komunikadu Imprensa
Munisípiu Oecusse
21 Novembru 2017

**Komunidade Suku Usitasase Munisípiu Oecusse agradese ba JSMP:
Materia kona-ba Direitu Labarik no Asesu ba Justisa Útil tebes ba sira**

Komunidade Suku Usitasase, Postu Administrativu Oesilio, Munisípiu Oecusse agradese ba JSMP no konsidera materia kona-ba direitu labarik no asesu ba justisa importante no útil ba sira. Komunidade sira hato'o sira nia espresaun ne'e bainhira partisipa iha treinamentu ho tema direitu labarik no asesu ba sistema justisa formál ne'ebé fasilita husi JSMP iha 17 Novembru 2017.

Treinamentu ne'e partisipa husi ema nain 30 inklui estrutura suku no comunidade, kompostu husi feto 12 no mane 18. Partisipante sira mai husi Aldeia Buqui, Sifin no Pune.

Treinamentu ne'e hanesan kontinuasaun hosi treinamentu iha munisípiu sira seluk ho objetivu atu hasa'e kuñesementu comunidade iha área rurál sira kona-ba asuntu sira relasiona ho direitu labarik iha setór justisa no kestaun sira kona-ba asesu ba justisa formál.

Materia ne'ebé apresenta no diskute durante treinamentu ne'e kobre asuntu sira kona-ba direitu no definisaun direitu labarik, tipu krime no tipu violénsia sira hasoru labarik tuir lei aplikável instituisaun relevante sira estadu nian ne'ebé iha obrigasaun atu proteze labarik tuir lei nasionál no internasionál, nomós konseitu kona-ba idade minoridade tuir lei aplikável sira.

“Treinamentu ne'e importante no útil tebes ba comunidade sira liu-liu ba estrutura suku sira nune'e bele ajuda hasa'e kuñesimentu sira nian kona-ba direitu labarik, no asesu ba sistema justisa formal,” dehan Luis de Oliveira Sampaio, Diretór Ezekutivu JSMP.

Iha treinamentu ne'e, partisipante sira apresenta problema ne'ebé sira infrenta mak hanesan abandona labarik no tipu ka forma oioin kona-ba violénsia hasoru labarik. Aleinde ne'e, partisipantes sira kestiona mós kona-ba kazu abuzu seksuál ba menór ne'ebé sempre akontese iha sira nia suku.

Xefe Suku Usitasae, Sr. Thomas Colo, iha sesaun abertura no enseramentu husu ba partisipante sira hodi fo hanoin katak partisipantes sira idak-idak hanesan inan-aman importante tebes atu hatene materia sira ne'ebé iha relasaun ho direitu labarik. Nia hatutan katak hanesan inan aman importante atu hatene ita nia obrigasaun hodi tau matan no proteze labarik sira husi kualker violénsia, la'os pelo-kontrariu inan-aman mak sai fali autór hodi halo fali violénsia hasoru labarik.

Aktividade ne'e realiza tanba ho apoiu orsamentu husi Embaixada Canada, iha Jakarta Indonezia.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Email : luis@jsmp.tl